

REGLUR

um tóbaksvarnir á vinnustöðum.

1. gr.

Markmið og gildissvið.

- 1.1. Markmið reglna þessara er að tryggja að starfsmenn, sem ekki reykja, verði ekki fyrir skaða og óþægindum af völdum tóbaksreyks á vinnustað sínum.
- 1.2. Reglurnar gilda um atvinnuhúsnæði, sem ekki eru sérstök ákvæði um í 9. og 10. gr. laga nr. 74/1984. Reglurnar gilda um þann hluta slíks húsnæðis sem sérstaklega er ætlaður starfsfólki og ekki fellur undir takmarkanir á reykingum vegna aðgangs almennings sbr. 1. mgr. 9. gr. sbr. og 2. og 3. mgr. 10. gr. laga nr. 74/1984.
- 1.3. Um grunnskóla, dagvistir barna, heilsugæslustöðvar, sjúkrahús og um húsakynni ætluð börnum og unglingum yngri en 16 ára til félags- og tómstundastarfa gilda sérstakar reglur sbr. 10. gr. laga nr. 74/1984.

2. gr.

Takmörkun á tóbaksreykingum í atvinnuhúsnæði.

- 2.1. Vinni starfsmaður einn í herbergi getur hann, að höfðu samráði við vinnuveitanda, ákveðið hvort reykt sé þar, en taka skal hann tillit til þeirra sem eiga þangað erindi.
- 2.2. Í vinnurými, þar sem tveir eða fleiri starfsmenn vinna eru tóbaksreykingar óheimilar, nema skv. samkomulagi starfsmanna og vinnuveitenda og skal þannig frá málum gengið að reykingar valdi ekki óþægindum fyrir þá sem ekki reykja.
- 2.3. Í kaffi- og matstofum má heimila reykingar á sérstöku afmörkuðum svæðum, samkvæmt samkomulagi stjórnenda og starfsmanna. Þar sem því verður við komið skal húsnæði skipt þannig að annars vegar séu reykingar leyfðar en hins vegar ekki. Þannig skal frá málum gengið að reykur berist ekki yfir á reyklausa svæðið.
- 2.4. Í fundarherbergjum er óheimilt að reykja, nema með samþykki allra viðstaddra.
- 2.5. Í lyftum eru tóbaksreykingar óheimilar.
- 2.6. Séu tóbaksreykingar leyfðar í búnings- og fataherbergjum, snyrtiherbergjum og salernum og á göngum og í forstofu sem ekki eru ætluð almenningi til notkunar skal haga þeim samkvæmt samkomulagi starfsmanna og vinnuveitenda. Sé almenningi jafnframt ætlaður aðgangur að snyrtiherbergjum og salernum, göngum og forstofu er óheimilt að reykja þar.
- 2.7. Forráðamenn húsnæðis, sem almenningur hefur aðgang að, en ekki fellur undir 9. og 10. gr. laga nr. 74/1984 um sérstaka takmörkun á tóbaksreykingum, geta sjálfir ákveðið að takmarka reykingar í húsnæðinu, sbr. 11. gr. laga nr. 74/1984.
- 2.8. Að öðru leyti en því sem greinir hér á undan fer um reykingar á vinnustöðum skv. samkomulagi starfsmanna og stjórnenda.
- 2.9. Ágreining, sem upp kann að koma um framkvæmd þessarar greinar skal leitast við að leysa innan vinnustaðanna sjálfra, með viðræðum vinnuveitenda og þeirra starfsmanna sem í hlut eiga.

3. gr.

Merkingar.

- 3.1. Þar sem tóbaksreykingar eru óheimilar skal það gefið til kynna með merkingum eða á annan greinilegan hátt.

4. gr.

Loftræsting.

- 4.1. Þar sem tóbaksreykingar eru leyfðar skal vera fullnægjandi loftræsting.

5. gr.

Eftirlit og viðurlög.

- 5.1. Telji starfsmaður reglur þessar brotnar og náist ekki að leysa ágreining sbr. 2. gr. 9. tl. getur viðkomandi kært það til öryggisráðarmanns eða öryggisnefndar á viðkomandi vinnustað. Sætti starfsmaður sig ekki við úrlausn getur hann skotið málinu til vinnueftirlits ríkisins. Að öðru leyti fer um brot gegn reglum þessum skv. lögum nr. 74/1984.
- 5.2. Vinnueftirlit ríkisins annast eftirlit með framkvæmd reglna þessara. Vinnueftirlit ríkisins og Hollustuvernd ríkisins geta þó gert með sér samkomulag um það að heilbrigðisnefndir annist eftirlitið á tilteknum vinnustöðum, að höfðu samráði við þær.

6. gr.

Gildistaka.

- 6.1. Reglur þessar, sem settar eru samkvæmt 12. gr. laga nr. 74/1984, um tóbaksvarnir, og að höfðu samráði við Vinnueftirlit ríkisins, öðlast gildi þegar við birtingu.

Heilbrigðis- og tryggingamálaráðuneytið, 24. desember 1985.

Ragnhildur Helgadóttir.

Ingimar Sigurðsson.

AUGLÝSING**um tollmeðferð á upprunavörum í viðskiptum Íslands, Portúgal og Spánar.**

Frá og með 1. janúar 1986 ganga Portúgal og Spánn í Efnahagsbandalag Evrópu. Frá sama tíma falla úr gildi fríverslunarsamningar EFTA-landanna og Spánar og aðild Portúgal að EFTA.

Samningaviðræður um bókun við fríverslunarsamning Íslands og EBE varðandi aðlögunartíma vegna aðildar Portúgal og Spánar að EBE er enn ekki lokið. Erindaskipti milli Íslands og EBE hafa hins vegar farið fram þar sem samkomulag er um að óbreytt ástand haldist í viðskiptum Íslands við Portúgal og Spán á tímabilinu 1. janúar til og með 28. febrúar 1986.

Með vísan til framanritaðs svo og 6. tl. 3. gr. laga nr. 120/1976 um tollskrá o. fl. með síðari breytingum tilkynnist hér með að tollmeðferð upprunavara frá Portúgal og Spáni svo og tollmeðferð vegna útflutnings íslenskra upprunavara til þessara landa skal haldast óbreytt til og með 28. febrúar 1986 samkvæmt ákvæðum auglýsinga nr. 267/1980 og 680/1980 með síðari breytingum.

Fjármálaráðuneytið, 30. desember 1985.

Þorsteinn Pálsson.

Sigurgeir A. Jónsson.